



Broj:03-05-224/10

Сарајево/Sarajevo, 06.07.2010. godine

IZVJEŠTAJ SA UZVRATNE BILATERALNE POSJETE PARLAMENTU KUVAJTA 27-28.06.2010.

Delegacija Grupe prijateljstva Parlamentarne skupštine Bosne i Hercegovine za saradnju sa zemljama Bliskog istoka i Sjeverne Afrike u sastavu: g. Sead Jamakosmanović, predsjedavajući, g. Sadik Baktić, g. Mirko Okolić, g. Vinko Zorić, članovi i Mirsada Bukarić-Kovačević, rukovodilac Sektora za međunarodne odnose i protokol PS BiH, boravila je u uzvratnoj bilateralnoj posjeti Kuvajtu od 27-28.06.2010. godine, gdje se susrela sa visokim dužnosnicima kuvajtske vlasti.

Sastanak sa g. Džasimom Muhamedom Al Horafijem (Jasim Mohammad Al Khorafi), predsjednikom Parlamenta Kuvajta:

- Nakon iskazane dobrodošlice g. Horafi je istakao da je posjeta delegacije PS BiH Kuvajtu potvrda dosadšnjim dobrim odnosima između naše dvije zemlje kao i poticaj daljeg jačanja i unapređenja svih oblika saradnje između Kuvajta i Bosne i Hercegovine. Izrazio zadovoljstvo intenziviranjem razmjena delegacija najvišeg nivoa u posljednje vrijeme u obe zemlje što poticajno djeluje na buduće ekonomske i privredne odnose, posebno na mogućnost investicijskih ulaganja koja bi dobro došla i BiH i Kuvajtu.

Predsjednik Parlamenta Kuvajta se interesirao za trenutnu situaciju u BiH, ističući evropski put kojim BiH nezaustavljivo ide, te izrazio nadu da BiH ide ka boljoj budućnosti, u kojoj će više mjesta biti za izgradnju infrastrukture, poslovnog okruženja, novih radnih mjesta. S tim u vezi je istakao značaj formiranih grupa prijateljstva u naša dva parlamenta kao generatora ekonomskog razvoja i posebno naglasio da Grupe prijateljstva mogu i trebaju doprinosti bržem i efikasnijem protoku informacija iz oblasti za koje postoje obostrana zainteresiranost. Predsjednik Horafi je zaželio svim Bosancima i Hercegovcima uspjeh na budućim parlamentarnim izborima u oktobru mjeseca.

Sastanku su prisustvovali i g. Abdulah Al Rumi, potpredsjednik Parlamenta Kuvajta i predsjednik Grupe prijateljstva sa Bosnom i Hercegovinom i g. Hussain Nasser Al Hariti, član grupe prijateljstva, ugledni pravnik, bivši ministar pravde i socijalnih pitanja, g. Adel Al Sarawi, član grupe prijateljstva i predsjedavajući Komisije za Budžet u Parlamentu Kuvajta.

G. Sead Jamakosmanović se zahvalio domaćinima na pozivu i ukazanom gostoprimstvu članovima delegacije Parlamentarne skupštine Bosne i Hercegovine. Potvrdio opredjeljenje PS BiH da se odnosi sa Kuvajtom i dalje unapređuju na svim poljima. Posebno istakao da bi se ekonomska saradnja BiH i Kuvajta mogla razvijati putem investicionih fondova, te napomenuo mnoge neiskorištene mogućnosti saradnje u oblasti turizma, naglašavajući banjski i medicinski turizam kao značajne u ponudi BiH, te naveo i saradnju u oblasti kulture kao posebnim faktorom razvoja. Naglasio da se kroz rad grupa prijateljstva formiranih u Parlamentima obe zemlje može dodatno pojačati ekonomska saradnja, odnosno da se u mnogim situacijama može skratiti put od informacije do realizacije određenih projekata.

Sastanak sa g. Husain Al Haritjem, Obostrano je izražena spremnost za otvaranje zajedničkih projekata, za investiranje kuvajtskog kapitala u BiH, posebno u projekte proizvodnje hrane, mesa i mesnih prerađevina. Kuvajtka je strana iskazala zainteresovanost za eko proizvodnju namirnica, i posebno za BiH medicinski kadar, ljekare, specijaliste svih profila, fizioterapeute, koji bi mogli biti angažovani u velikim medicinskim centrima Kuvajta. U okviru posjete Kuvajtu, delegacija Parlamentarne skupštine Bosne i Hercegovine posjetila je **Fondaciju Al Baptin** najveću riznicu knjiga, rukopisa, dokumenata, koja posebno potiče razvoj u književnosti, literaturi i svim drugim oblicima pisane riječi. S tim u vezi delegacija PS BiH je informisana da će u Sarajevu u oktobru mjesecu 2010. godine ova Fondacija uručiti prigodne nagrade najuspješnijim Bosancima i Hercegovcima u toj oblasti.

Delegacija Grupe prijateljstva PS BiH za saradnju sa Kuvajtom imala je priliku posjetiti dvije Divanije, mjesta okupljanja uglednih porodica, parlamentaraca, ali i običnih građana, gdje se u neformalnim razgovorima diskutuje o najaktualnijim pitanjima ali i svakodnevnici Kuvajćana. Prema objašnjenjima domaćina, Divanije predstavljaju u izvjesnom smislu izborne ćelije, mjesta gdje se formiraju određeni prijedlozi i odakle veoma često poteknu inicijative za važna parlamentarna razmatranja. Ovaj način organizovanja nukleusa parlamentarizma, prilagođen je senzibilitetu i tradicionalnom načinu života u Kuvajtu i predstavlja poseban vid kampanje, netipičan za evropsko poimanje predizbornih priprema, ali suštinski odražava susret sa biračkim tijelom, predstavnicima naroda, razgovore o eventualnim programima isl.

Predstavnici Parlamenta Kuvajta priredili su za delegaciju Parlamentarne skupštine BiH zvanični ručak na Kuvajtskim tornjevima, simbolima ovog grada i države, u čijoj su izgradnji sudjelovale i kompanije BiH u sklopu drugih firmi iz bivše zajedničke države.

Značajan doprinos realizaciji ove posjete dala je Ambasada BiH u Kuvajtu, koja je veoma profesionalno propratila delegaciju PS BiH u uzvratnoj bilateralnoj posjeti Kuvajtu, na čemu im i ovom prikom želimo iskreno zahvaliti.

Izvještaj pripremila

Mirsada Bukarić-Kovačević

Rukovodilac Sektora za međunarodne odnose i protokol

Izvještaj odobrio:

Dr. Sead Jamakosmanović

Predsjedavajući Grupe prijateljstva PS BiH za saradnju sa Kuvajtom

Dostavljeno:

- Kolegiju Predstavničkog doma PS BiH
- Kolegiju Doma naroda PS BiH
- Komisiji za vanjske poslove PD PS BiH
- Komisiji za vanjsku, trgovinsku politiku, carine, saobraćaj i komunikacije
- Grupi prijateljstva za saradnju sa Kuvajtom
- Kolegiju Sekretarijata PS BiH
- Ministarstvu vanjskih poslova BiH
- a/a